



## ENSURING NATIONAL SECURITY IN THE INFORMATION SPHERE

D.TADJIBAEVA<sup>a</sup> Tashkent State University of Law, Tashkent, 100047, Uzbekistan

<sup>a</sup> Tashkent State University of Law

## ОБЕСПЕЧЕНИЕ НАЦИОНАЛЬНОЙ БЕЗОПАСНОСТИ В ИНФОРМАЦИОННОЙ СФЕРЕ

Д.ТАДЖИБАЕВА<sup>a</sup> Ташкентский государственный юридический университет, Ташкент, 100047, Узбекистан

<sup>a</sup> Ташкентского государственного юридического университета

## АХБОРОТ СОҲАСИДА МИЛЛИЙ ХАВФСИЗЛИКНИ ТАЪМИНЛАШ

Д.ТАДЖИБАЕВА<sup>a</sup> Тошкент давлат юридик университети, Тошкент, 100047, Ўзбекистон

<sup>a</sup>Тошкент давлат юридик университети

**Аннотация:** мақолада республикамиз хавфсизлиги, барқарорлигига раҳна солаётган мафкуравий таҳдидлар, Ҳаракатлар стратегиясининг “Хавфсизлик, миллатлараро тотувлик ва диний бағрикенгликни таъминлаш ҳамда чуқур ўйланган, ўзаро манфаатли ва амалий ташиқи сиёсат соҳасидаги устувор йўналишлар” деб номланган бешинчи устувор йўналишининг биринчи бандида белгиланган ахборот хавфсизлигини таъминлаш ва ахборотни ҳимоя қилиш тизимини такомиллаштириш, ахборот соҳасидаги таҳдидларга ўз вақтида ва мутаносиб равишда қарши ҳаракатларни ташкил этиш масалалари ёритилган.

**Калим сўзлар:** хавфсизлик, мафкуравий таҳдидлар, Ҳаракатлар стратегияси, ахборот хавфсизлиги, миллий контент, миллий сигмент, интернет, кибернетик лудомания, ахборотни ҳимоя қилиш, миллий контентни ривожлантириш бўйича комплекс дастур.

**Аннотация:** в статье рассматриваются идеологические угрозы безопасности, стабильности республики, совершенствование системы обеспечения информационной безопасности и защиты информации, своевременные и пропорциональные противодействия предусмотренных в первой части пятого приоритетного направления стратегии действий «Обеспечение безопасности, религиозной толерантности и межнационального согласия, осуществление взвешенной взаимовыгодной и конструктивной внешней политики».

**Ключевые слова:** безопасность, идеологические угрозы, Стратегия действий, информационная безопасность, национальный контент, национальный сегмент, интернет, кибернетическая лудомания, защита информации, комплексная программа по развитию национального контента.

**Abstract:** this article describes ideological threats to security, and stability of the republic, improvement of the information security system, timely and proportionate countermeasures, which are mentioned in the first part of the fifth priority directions of the Strategy of Action “Priority areas in the field of security, inter-ethnic harmony and religious tolerance, and implementation of balanced, mutually beneficial and constructive foreign policy”.

**Keywords:** security, ideological threats, threats, Strategy of action, information security, national content, national segment, Internet, cybernetic ludomania, information protection, integrated program for the development of national content.

Ўзбекистон Республикасининг Президенти Ш.Мирзиёев ташаббуси билан ишлаб чиқилган Ҳаракатлар стратегиясининг бешинчи йўналиши сифатида “Хавфсизлик,

миллатлараро тотувлик ва диний бағрикенгликни таъминлаш ҳамда чуқур ўйланган, ўзаро манфаатли ва амалий ташқи сиёсат соҳасидаги устувор йўналишлар” белгиланди [1]. Мазкур устувор йўналиш бугунги кунда дунёда энг долзарб масала бўлган хавфсизликни ва жамиятда ижтимоий-сиёсий барқарорликни таъминлашга қаратилган.

Мазкур устувор йўналиш Ҳаракатлар стратегиясида энг муҳим йўналиш ҳисобланади, чунки ижтимоий-сиёсий барқарорлик демократик, адолатли жамият куришининг энг муҳим асосидир. Барқарорлик, тинчлик, тотувлик – булар давлатчилигимизнинг янги биноти барпо қилинадиган пойдевордир. Барқарорлик доимо инсоният тарихида яратувчилик, бунёдкорлик фаолияти учун асос бўлган. Бежизга қадимги машҳур файласуф Конфуций: “Фаровонлик – мақсад, ислохотлар – унга эришиш йўли, барқарорлик эса шарт-шароитдир”, – деб айтмаган.

Бешинчи устувор йўналишнинг биринчи бандида республикамиз хавфсизлиги, барқарорлигига раҳна солаётган таҳдидлар: мафкуравий, сиёсий, ҳарбий, экологик, техноген хавфлардан аҳолини ҳимоялаш мақсадида бир қатор чора-тадбирлар белгиланган. Ўзбекистоннинг конституциявий тузуми, суверенитети, ҳудудий яхлитлигини муҳофаза қилиш, давлатнинг мудофаа салоҳиятини мустаҳкамлаш, Ўзбекистон Қуроли Кучларининг жанговор қудрати ва қобилиятини оширишга эътибор қаратилган.

Аммо хавфсизликни таъминлаш бу фақатгина мамлакатни чегараларини ҳимоя қилиш ва мудофаа салоҳиятини мустаҳкамлаш эмас, балки фуқароларнинг онгини, дунёқарашини ҳам ҳимоя қилишдир. Бинобарин, ахборот хавфсизлигини таъминлаш ва ахборотни ҳимоя қилиш тизимини такомиллаштириш, ахборот соҳасидаги таҳдидларга ўз вақтида ва мутаносиб равишда қарши ҳаракатларни ташкил этиш, бугунги куннинг энг долзарб масалаларидан бири ҳисобланади.

Аввало, шу аччиқ ҳаётий ҳақиқатни эътироф этиш керакки, глобаллашув жараёнида ахборот ғоявий таъсир ўтказишнинг кучли воситасига айланиб бормоқда. Аксарият мафкуравий марказлар ўзларининг ғаразли мақсадларига эришишда ахборот хуружларидан фойдаланмоқда.

Бугунги воқелик ҳар қандай давлат олдида ахборот хавфсизлигини таъминлаш масаласини кўндаланг қилиб қўймоқда.

Бу жиҳатдан, XX аср охири – XXI аср бошларида юз берган ахборот инқилоби инсон ва жамият борлигини тубдан ўзгартириб юборди. У географик ва вақт билан боғлиқ тўсиқларни емирди, чегараларни очиб ташлади, дунёнинг исталган нуқтаси билан мулоқот қилиш имконини яратди, фаолият турларининг мазмунини ўзгартирди. Илгари амалга оширилишига ойлар ва йиллар сарфланган ишлар энди санокли кунлар ва дақиқаларда амалга оширила бошлади. Янги шароитда “ҳудуд” ва “масофа” тушунчалари ўзининг аввалги мазмуни ва аҳамиятини йўқотди [2].

Ахборотлашган жамият тушунчаси кишилик жамияти ривожланишининг ҳозирги босқичида шаклланаётган ва ижтимоий ҳаётнинг барча соҳаларида ахборот ҳамда информатикадан оқилона фойдаланишга асосланган сифатий ҳолатини тавсифловчи тушунча ҳисобланади. Ахборотлашган жамият назарияси асосчилари ижтимоий ривожланишни “босқичлар алмашинуви” нуқтаи назаридан қараган ҳолда, унинг шаклланишини қишлоқ хўжалиги, sanoat ва хизматлар иқтисодиётидан кейин пайдо бўлган иқтисодиётнинг тўртинчи – “ахборот сектори” юзага келиши билан боғлайдилар.

Уларнинг фикрига кўра индустриал жамиятнинг асоси бўлган капитал ва меҳнат ахборотлашган жамиятда ўз ўрнини ахборот ва билимга бўшатиб беради. Ахборотлашган жамиятда иш билан банд кишиларнинг аксарият қисми ахборотни, айниқса, унинг асосий шакли бўлмиш билимларни яратиш, сақлаш, қайта ишлаш ва тарқатиш билан машғул бўладилар. Бошқача айтганда, билимлар ва ахборот бундай жамиятларда ишлаб чиқаришнинг асосий маҳсулига айланади. Ахборотлашган жамиятда нафақат ишлаб чиқариш, балки турмуш тарзи, кадриятлар тизими ўзгаради, моддий кадриятларга нисбатан маданий ҳордиқнинг аҳамияти ортади [3].

Ахборотлашган жамиятда ахборот технологиялари, коммуникациялар соҳасида банд кишилар миқдори ортади, ялпи ички маҳсулот яратишда уларнинг улуши ўсади, янги

технологиялардан фойдаланиш ҳисобига вақтни тежаш – янги кадрият сифатида қарор топади, электрон демократия, информацион иқтисодиёт, электрон давлат, электрон ҳукумат, рақамли бозорлар, электрон социал тармоқлар ривож топади.

Тегишли адабиётларда ахборотлашган жамиятнинг қуйидаги асосий хусусиятларини ажратиб кўрсатилади:

– технологик омил (энг муҳим омил) – ишлаб чиқаришда, ташкилот ва корхоналарда, таълим тизимида ва маиший ҳаётда ахборот технологиялари кенг қўлланилади;

– ижтимоий омил – ахборот ҳаёт сифатини ўзгартиришга рағбат беради, “информацион тафаккур” шаклланади ва мустаҳкамланади;

– иқтисодий омил – ахборот муҳим ресурс, товар, хизмат, бандлик ва қўшимча қиймат манбаи сифатида иқтисодиётда ҳал қилувчи омилга айланади;

– сиёсий омил – ахборот эркинлиги фуқароларнинг сиёсий жараёнлардаги иштирокини юксалтиради ҳамда аҳолининг турли қатламлари ўртасида келишувни таъминлайди;

– маданий омил – ахборот муҳим кадрият сифатида тан олиниб, унинг алоҳида шахс ва яхлит жамиятни ривожлантириш манфаатларига хизмат қилиши эътироф этилади [4].

Айни пайтда ахборотлашган жамиятда ҳам муайян муаммолар, қийинчиликлар, зиддиятлар мавжуд бўлади, хавотирли тенденциялар ҳам йўқ эмас.

Оммавий ахборот воситаларининг кўп асрлик тараққиёти 1986 йилда Интернетнинг пайдо бўлишига замин ҳозирлади. Интернет инсонларга чексиз янги имкониятлар яратди. Икки омил – Интернетнинг пайдо бўлиши ҳамда коммуникация хизматлари учун нархларнинг пасайиши ахборот соҳасининг ривожини жадаллаштириб юборди. Компьютерлар ва алоқа хизматлари учун нархларнинг пасайиши уларнинг ҳаммабоп ва оммабоп бўлишига туртки бўлди. Бу эса, ўз навбатида, ахборот индустриясига ҳал қилувчи таъсир кўрсатди, унинг миллионлаб янги истеъмолчилари ва кенг қўламли бозорлари пайдо бўлди. АҚШнинг Савдо-сотик вазирлиги томонидан ўтказилган тадқиқот натижаларига кўра 50 миллионлик аудиторияни қамраб олиши учун радиога 30 йил керак бўлди, телевидениега эса 13 йил ва Интернетга атиги 4 йил кифоя қилди [5].

Бугунги кунда Интернет инсон ҳаётининг деярли барча жабҳаларига дахл қилмоқда. У шахсга ўз билимларини ошириш, ҳордиқ чиқариш, халқаро ва ички сиёсатда содир бўлаётган воқеаларни кузатиб бориш, сиёсий ва иқтисодий муносабатларнинг фаол субъекти бўлиш, кўргазмалар уюштириш, тақдимотлар ўтказиш, зарур нарсаларни харид қилиш имконини беради. Интернет ҳукуматлар, давлат раҳбарлари, турли вазирликлар ва ташкилотлар, сиёсий партиялар ва жамоат ташкилотлари фаолиятининг фуқаролар учун шаффоф бўлишига хизмат қилмоқда.

Шу билан бирга, Интернетда уюм-уюм ахборот “ахлатлари” борлигини ҳам эътироф этиш зарур. Бундан ташқари, бугунги кунда иллат сифатида гиёҳвандликка тенглаштириш мумкин бўлган Интернетга қарамлик авж олган. Ёшлар асосий вақтларини ижтимоий тармоқларга сарф қилсалар, мактаб ўқувчилари эса компьютер ўйинларига тобора муккасидан кетмоқдалар. Компьютер ўйинларига ҳаддан ташқари берилиш болаларнинг, ёшларнинг жисмоний ва маънавий соғлиғига салбий таъсир кўрсатмоқда. Интернет тармоғидаги эркинлик компьютерга қарамликни кучайтиради, бугунги кунда бир қанча давлатларда бундай кишиларни мажбурий даволаш йўлга қўйилмоқда.

“Кибернетик лудомания” тушунчаси жаҳон медицина амалиётига расман киритилган касаллик номи. Киберлудомания – компьютер ўйинбозлиги. Россиядаги Бехтерев номидаги Психиатрия институтида 7 йил давомида ушбу касалликдан 200 киши даволаниб чиққан. Италияда лудомания синдромига чалинган беморларга ёрдам кўрсатиш расман йўлга қўйилган. Хитойда ҳам компьютерга боғланишдан даволовчи худди шундай клиника очилди. Пекин ҳарбий госпитали қошида очилган бу клиникада юзлаб беморлар кунига 50 АҚШ доллари тўлаб даволаниб чиқишади. Кореяда ҳар йили ўйинбозликдан 7 киши ҳалок бўлмоқда [6].

Компьютер клубларида аксарият мактаб ўқувчилари ўйнайдиган “Контр страйк”, “Контра”, “Дота”, “Бой без правил” ўйинлари болаларда шафқатсизлик ва тажовузкорлик иллатларини шакллантиради. Ўйин пайтидаги узлуксиз руҳий зўриқиш эса мия ва юрак фаолиятига салбий таъсир кўрсатади.

Мобил телефонлари орқали компьютер ўйинларини онлайн тарзда ўйнаш имкониятини пайдо бўлиши болаларни ўйинбозлик касалига чалиниш хавфини янада оширди.

2016 йилдан бошлаб ижтимоий тармоқларда ўсмирларнинг нафақат жисмоний ва маънавий соғлиғига, балки тўғридан-тўғри ҳаётига хавф соладиган ўйинлар пайдо бўлди. Россияда 7 ёшдан 18 ёшгача ўсмирлар ўртасида суицид ҳолатининг кўпайиб кетишига “Тихий дом” ёки “Синий кит” ўйинлари сабаб бўлгани аниқланди. 50 босқичдан иборат бўлган бу ўйиннинг охирги босқичи ўсмирнинг ўзини ўзи ўлдириши билан якун топади.

Компьютер ўйинлари, ижтимоий тармоқлар ёшларнинг қўлидаги китоб ва спортнинг ўрнини тобора эгаллаб бормоқда, уларни баркамол авлод қилиб тарбиялаш учун қилаётган саъй-ҳаракатларимизга тўсқинлик қилмоқда. Бу ҳолат ёшларимизнинг келажагига ўнглаб бўлмас даражада таъсир кўрсатади. Ўзбекистон Республикасининг Биринчи Президенти Ислом Каримовнинг “Юксак маънавият – енгилмас куч” китобида ушбу муаммонинг ечими кўрсатиб берилган: “Ҳаммамиз яхши биламизки, ҳар қайси давлатнинг чегараларини дахлсиз сақлашда ҳарбий куч-қудрат, қуролли кучлар сув ва ҳаводек зарур. Аммо халқимиз, авваломбор, ёш авлодимиз маънавий оламининг дахлсизлигини асраш учун биз нималарга таяниб-суяниб иш олиб боришимиз керак, деган савол бугун барчамизни ўйлантириши табиий.

Мен, ҳаётда кўп бора тасдиғини топган ҳақиқатдан келиб чиққан ҳолда, бу масалада шундай деган бўлардим: тобора кучайиб бораётган бундай хатарларга қарши доимо сергак, огоҳ ва ҳушёр бўлиб яшашимиз зарур. Бундай таҳдидларга қарши ҳар томонлама чуқур ўйланган, пухта илмий асосда ташкил этилган, мунтазам ва узлуксиз равишда олиб бориладиган маънавий тарбия билан жавоб бериш мумкин” [7].

Мустақиллик йилларида мамлакатимизда мазкур соҳа ривожига хизмат қилувчи ҳуқуқий, иқтисодий, ижтимоий, илмий-маърифий ва маънавий-мафкуравий асослар яратилди, деб бемалол айтиш мумкин. Жумладан, соҳанинг ҳуқуқий асоси сифатида демократик талаб ва стандартларга тўла мос келадиган, ўнга яқин қонун ҳужжатларини ўз ичига олувчи қонунчилик базаси яратилди. Улар орасида “Ахборот эркинлиги ва кафолатлари тўғрисида”, “Оммавий ахборот воситалари тўғрисида”, “Телекоммуникациялар тўғрисида”, “Реклама тўғрисида”, “Муаллифлик ҳуқуқи ва турдош ҳуқуқлар тўғрисида”, “Ахборотлаштириш тўғрисида”ги муҳим қонунлар, кўплаб қонуности ҳужжатлари соҳа ривожининг адолатли ҳуқуқий маконда кечишини таъминлашда муҳим роль ўйнамоқда.

**“Фуқароларнинг ахборот соҳасидаги ҳуқуқ ва эркинликларини таъминлаш масаласи инсоннинг ахборот олиш, ахборотни ва ўз шахсий фикрини тарқатиш ҳуқуқи ва эркинлигини ўзида мужассам этган бўлиб, бу Ўзбекистонда демократик жамият асосларини барпо этишнинг муҳим шарт, таъбир жоиз бўлса, тамал тоши ҳисобланади” [8].**

Агар истиқлолнинг дастлабки йилларида республикада фаолият кўрсатаётган оммавий ахборот воситаларининг аксарияти давлат тасарруфида, демак, уларнинг иқтисодий-молиявий таъминоти ҳам давлат зиммасида бўлган бўлса, бугунги кунга келиб республикада мавжуд барча телеканалларнинг 53 фоизи, радиоканалларнинг эса 85 фоизи нодавлат ОАВси ҳисобланади. Босма оммавий ахборот воситаларига эгалик – муассислик қилишда нодавлат секторининг улуши бундан-да кўпроқ фоизни ташкил этади. Жаҳон ахборот бозори меъёр ва талабларига тобора мослашиб бораётган мазкур ОАВлари ўзини ўзи бошқариш, маблағ билан таъминлаш, ўқувчи – томошабин – мухлис эътиборини тортишнинг хилма-хил усул-услубларини фаол изламоқда ва топмоқда. Натижада айрим

марказий нашр ва каналлардан ташқари аксарият ОАВлари иқтисодий мустақилликка, яъни тўла фаолият эркинлигига эгадир.

Ушбу соҳани ҳам глобаллашиб бораётган дунёга, шиддатли ривожланаётган замон чақириқларига мунтазам мослаб боришдек долзарб талабдан келиб чиқиб, Ҳаракатлар стратегиясида ахборот хавфсизлигини таъминлаш ва ахборотни ҳимоя қилиш тизимини такомиллаштириш, ахборот соҳасидаги таҳдидларга ўз вақтида ва мутаносиб равишда қарши ҳаракатларни ташкил этиш бўйича қатор тадбирлар белгиланган.

Ўзбекистон Республикаси Вазирлар Маҳкамасининг 14 август 2017 йилдаги 625-сон қарори билан 2017 – 2019 йилларда Интернет жаҳон ахборот тармоғида миллий контентни ривожлантириш бўйича комплекс дастур тасдиқланди.

У қуйидагиларни назарда тутди:

- миллий контент ва веб-ресурсларни ривожлантиришни рағбатлантириш ва оммалаштириш, уларнинг ташкилий, моддий-техник ва молиявий қўллаб-қувватлаш тизимини яратиш;

- интернетнинг миллий сегментини ғоявий-мазмунан тўлдириш, фойдаланувчиларнинг, энг аввало, ёшларнинг замонавий талабларига жавоб берадиган оммабоп ахборот ресурслари, медиа-маҳсулотлари, бадиий, мультипликацион ва ҳужжатли фильмларни яратиш ва ривожлантириш, шунингдек интернет-журналистикани ривожлантириш;

- маҳаллий ижтимоий тармоқларда миллий контентни ривожлантириш ва хорижий ахборот ресурсларида унинг улушини ошириш, Ўзбекистон мессенжерлари ва ижтимоий тармоқлари фаолиятини такомиллаштириш, уларнинг жозибадорлигини ошириш ҳисобига аудиториясини кенгайтириш;

- таълим контентини янада такомиллаштириш, “ZiyoNET” таълим ахборот тармоғи имкониятларини кенгайтириш, таълим муассасалари ўқув дастурлари билан интеграцияланган замонавий веб-ресурсларни яратиш;

- Интернетда яратиладиган миллий ахборот ресурсларини янада тарғиб қилиш ва оммалаштириш [9].

Комплекс дастурни сифатли амалга ошириш учун вазирликлар ва идоралар, шунингдек хўжалик бошқаруви органлари раҳбарлари шахсан масъул этиб белгилаб кўйилди.

Мазкур Дастурда белгиланган тадбирлар миллий ахборот тизимини ҳар томонлама қўллаб-қувватлаш, унинг фаолиятини такомиллаштириш ва таъсир доирасини оширишга ҳамда ёшларнинг ахборот-психологик хавфсизлигини таъминлашга хизмат қилади.

Бугун Ўзбекистон ягона ахборот тизимининг фаол субъектига айланди. Унинг дунё билан алоқаси, жаҳон ижтимоий-сиёсий жараёнларига иштироки, давлатлараро муносабатлар, сиёсий, иқтисодий, ижтимоий, ҳуқуқий ва маданий алоқалари умумжаҳон ахборот тизими таркибида амалга оширилмоқда. Бу бевосита электрон почта, электрон ахборот алмашиш тизими орқали ҳам миллий, ҳам дунёвий муаммоларни ҳал этишда фаолият самарадорлигини оширишда, вақтни тежашда, молиявий харажатларнинг кескин камайишида, қолаверса, замонавий ахборот алмаштириш салоҳиятини намоён қилишда катта самара бермоқда.

Миллий ахборот тизимини ҳар томонлама қўллаб-қувватлаш, унинг фаолиятини такомиллаштириш ва таъсир доирасини ошириш учун, бизнингча, қуйидагиларга алоҳида эътибор бермоқ лозим:

- оммавий ахборот воситаларида ҳозиргача шаклланган тил, услуб ва ифода усулини ўзгартириш керак. Ахборот маконини ҳаётга, ёшларга, уларнинг кундалик ташвишу изтиробларига, янгиланаётган жамият муаммоларига юксак маҳорат билан мослаштириш;

- Ўзбекистон ёшлар иттифоқи фаолиятини янада такомиллаштириш, уларнинг сўзи ва фикрининг таъсирчанлигини ошириш керак. Токи ҳар қандай умумманфаат ва умумтараққиёт йўлида айтилаётган сўз ҳар бир фуқаронинг қалбига кирсин, онгига

сингсин. Уни рағбатлантисин, руҳлантисин, миллий яқдилликка, миллий бирликка даъват этиш;

– Ахборот тарқатиш борасидаги можароларга йўл қўймай, уларга юксак сиёсий ва касбий маданият орқали ёндашиш. Бефарқлик, сукут сақлаш кайфиятига барҳам бериб, миллий орият, миллий нафсоният билан боғлиқ ҳолдаги тарғиботчилик имкониятимизни намоён этиш йўлидан бориш;

– Ҳар қандай ҳужумкор ва бузғунчи ғояга қарши ўз вақтида, мўлжални аниқ олиб муносабат билдиришда эҳтиросларга берилмаслик, ортиқча шов-шувларга йўл қўймасдан сиёсий вазминлик ва босиқлик, айти пайтда, кучли таъсир ўтказиш усуллари ўзлаштириш;

– Ахборот соҳасида ахборот хуружи қизгин авж олган бир пайтда айти ана шу хуружлар моҳиятини, унинг манбаларини, ривожланиш омилларини чуқур ўрганиш лозим. Бузғунчи ва ҳужумкор ахборотлар мақсад-муддаоли, уларнинг тагида ётган манфаатлар қанчалик тўғри ўрганилса, уларга шунчалик тўғри ва ишончли зарба бериш мумкин бўлади.

Шуни таъкидлаш керакки, ахборот соҳасида миллий хавфсизликни таъминлашнинг Ўзбекистон тажрибаси такомиллашиб бормоқда. Ахборот хуружи авж олаётган, ахборот тарқатиш технологиялари тобора такомиллашиб, унинг усул ва услублари янгиланиб бораётган бир пайтда Ўзбекистон айти ана шу цивилизациявий жараённинг энг самарали, энг инсонпарвар усуллари яна ҳам кенгроқ фойдаланиш имкониятларини қидирмоқда.

Хулоса қилиб айтганда, Ҳаракатлар стратегиясининг “Хавфсизлик, миллатлараро тотувлик ва диний бағрикенгликни таъминлаш ҳамда чуқур ўйланган, ўзаро манфаатли ва амалий ташқи сиёсат соҳасидаги устувор йўналишлар”ида ахборот хавфсизлигини таъминлаш бўйича белгиланган чора-тадбирлар миллий контент ва веб-ресурсларни ривожланиши, ёшларнинг замонавий талабларига жавоб берадиган оммабоп ахборот ресурслари, медиа-маҳсулотлари яратилишини таъминлайди. Интернетда яратиладиган миллий ахборот ресурслари ёшларимизнинг мустақил фикрлаш қобилиятини ривожланиши, ҳар қандай ҳужумкор ва бузғунчи ғояга қарши мафқуравий иммунитетини мустаҳкамлашга ёрдам бериши, охир-пировардида юртимиз ва жаҳонда юз бераётган муҳим ҳодисаларга дахлдорлик ҳисси билан яшашини кучайтириши шубҳасиздир.

## References:

1. O‘zbekiston Respublikasi Prezidentining 2017-yil 7-fevraldagi “O‘zbekiston Respublikasini yanada rivojlantirish bo‘yicha Harakatlar strategiyasi to‘g‘risida”gi PF-4947-son Farmoni (O‘zbekiston Respublikasi qonun hujjatlari to‘plami, 2017 y., 6-son).
2. A.Azizxo‘jayev, N.Umarova, R.Qo‘chqorov. Globallashuv va axborotlashgan jamiyat muammolari. – T.: Akademiya, 2011. – B.14 – 15.
3. Qo‘chqorov R, Tojiboyeva D., Milliy g‘oya: asosiy tushuncha va tamoyillar. – T.: TDYU, 2016. – B.89.
4. <[http://socialengec.ucoz.ru/publ/teorii\\_socialnogo\\_razvitija/storonniki\\_informacionnogo\\_obshestva/3-1-0-95](http://socialengec.ucoz.ru/publ/teorii_socialnogo_razvitija/storonniki_informacionnogo_obshestva/3-1-0-95)>
5. “Ministerstvo torgovli SSHA soobshayet...” // Mir Internet. – 1998, – № 6.
6. Quronov M. Ezgu g‘oyalar ro‘yobi. – T.: Ma‘naviyat, 2011. – B.63.
7. Karimov I.A. Yuksak ma‘naviyat – yengilmas kuch. – T.: Ma‘naviyat, 2008. – B.115.
8. Karimov I.A. Mamlakatimizda demokratik islohotlarni yanada chuqurlashtirish va fuqarolik jamiyatini rivojlantirish konsepsiyasi: O‘zbekiston Respublikasi Oliy Majlisi Qonunchilik palatasi va Senatining qo‘shma majlisidagi ma‘ruza. 2010-yil 12-noyabr. – T.: “O‘zbekiston”, 2010. – B.131–132.
9. <<http://www.norma.uz/>>